



## IZVJEŠTAJ

### sa održanog sastanka aktiva direktora i predagoga osnovnih škola

Dana 27. januara 2016. godine, sa početkom u 11 sati, održan je sastanak Aktiva direktora osnovnih škola TK, u JU OŠ „Kreka“ Tuzla. Na sastanku je prisustvovalo 68 direktora škola kao i predsjednici aktiva pedagoga te Savjetnici Pedagoškog zavoda Tuzlanskog kantona Tuzla. Sastanak je imao prije svega informativni karakter s ciljem prezentacije opservacija i analiza iz dijela prvog polugodišta školske 2015/16 i davanje informacija i uputa za nastavak školske godine za drugo polugodište.

Na početku sastanka iznešena je informacija o dostavljenim izvještajima sa prve klasifikacije školske 2015/16. godine, i naznačena je važnost pravovremenog praćenje svih informacija koje daje Pedagoški zavod, a pored toga su navedene i teškoće u komunikaciji kao i način njihovog prevazilaska.

Škole su dobile obavijest o aktivnostima tokom raspusta:

- *Informacija o provođenju aktivnosti analize primjene Indeksa inkluzivnosti u školama po fazama realizacije i Programa razvoja škola (PRŠ) i usklađivanju istih u skladu sa datim uputama.*

U 2015. godini 35 škola su prošle edukaciju Primjene Indeksa inkluzivnosti i uradile Program razvoja škola za period od 3 godine, kao i projekat uz materijalnu podršku za ostvarivanje nekog od prioritetnih ciljeva. Tokom zimskog raspusta učenika, s ciljem jačanja kompetencija nastavnika u primjeni Indeksa inkluzivnosti škole, su izvršile evaluaciju ostvarenosti ciljeva iz PRŠ (Program razvoja škola) kao i diseminaciju / edukaciju nastavnika koji su iz opravdanih razloga izostali sa edukacije ili su nastavnici koji su angažovani početkom 2015/16 godine u školama. Primjena Indeksa inkluzivnosti kao način unapređenja organizacije rada i demokratizacije škola je jedan od strateških ciljeva Pedagoškog zavoda i Ministarstva obrazovanja, nauke, kulture i sporta TK.

Usklađene PRŠ sa izvršenom evaluacijom ostvarenosti prioriteta razvoja, te analizu rada i djelovanja inkluzivnih timova škole po fazama, škole su dužne dostaviti svojim kritičkim prijateljima (savjetnicima u PZ) do kraja januara 2016. godine, na predhodno dostavljenom obrascu.

- *Diseminacija/edukacija zaposlenika škola u jačanju „Socijalne kohezije“ kao načina jačanja profesionalne zajednice,*

Škole koje su prošle edukaciju iz „Socijalne kohezije“ s ciljem jačanja unapređenja razvoja PROFESIONALNE ZAJEDNICE KOJA UČI tj. jačanja stručnog usavršavanja na konkretnim pitanjima i problemima sa kojima se susreće, imajući u vidu da svi nastavnici nisu mogli biti neposredno uključeni. Date su smjernice školama, na afirmaciji stručnog usavršavanja na nivou škola i potrebi da učesnici na seminarima i edukativnim radionicama koje organizuje Pedagoški zavod TK, diseminiraju u svojim školama stečena znanja i iskustva nastavnicima u školama.

- *Izvještaj o kvantitativnoj i kvalitativnoj analizi uspjeha i vladanja učenika sa analizom izostanaka, te provođenju Protokola o prevenciji i postupanju u slučajevima nasilja nad djecom i programa prevencija planiranih Godišnjim programom rada škola TK:*

Posebna pažnja je posvećena kvantitativnoj i kvalitativnoj analizi rada škole; realizacije NPP i odgojnog djelovanja škole. Posebno je u fokusu praćenja izostajanje učenika sa nastave. Istraživanjem, putem Instrumentarija vrednovanja, je utvrđeno da se broj izostanaka učenika sa nastave u posljednje dvije godine osjetno povećao. Razlozi izostanaka su višestruki (Migracija u EU u pokušaju sticanja azila, nedovoljno uključivanje roditelja kao partnera škole, zakašnjavaње učenika na nastavu ...). Prema Godišnjem programu rada škola, škole imaju obavezu da stalno i kontinuirano kroz odgojni rad u odjeljenskoj zajednici, vannastavne aktivnosti i projekte posvećuju pažnju: prevenciji vršnjačkog nasilja i delinkvencije, prevenciji zloupotrebe droga i borbe protiv bolesti ovisnosti (narkomanije, pušenje i alkoholizma) kao strateških ciljeva obrazovanja u TK.

„Protokol o prevenciji i postupanju u slučajevima nasilja među i nad djecom“, obaveza je škola da se u potpunosti primjenjuje i o istom rade periodične analize i izvještaji, te u skladu sa istim poduzimaju mjere prevencije. Posebno je istaknuto da se o „Protokolu prevencije“, moraju informisati nastavnici, učenici i roditelji, ostvariti saradnja sa lokalnom zajednicom te relevantnim institucijama na jačanju sigurnosti. Izvještaje o uspjehu učenja i vladanja, te realizaciji programa prevencije potrebno je dostaviti Pedagoškom zavodu TK. Strukturu izvještaja čini tabelarni i narativni dio sa mjerama za poboljšanje efikasnosti škola.

- *Prezentacija novog Pravilnika o praćenju napredovanja učenika i ocjenjivanje:*

Izvršena je prezentacija novog Pravilnika o napredovanju, vrednovanju i ocjenjivanju učenika u osnovnoj školi, a koji je u primjeni od 23. decembra 2015. godine. Istaknute su specifičnosti izmjena i dopuna s ciljem poboljšanja objektivnosti u ocjenjivanju i veće motivacije učenika za učenje.

- *Informacija o provedenom vrednovanju škola:*

Date su relevantne informacije o provedenom vrednovanju škola na osnovu važećeg instrumentarija, te su po kategorijama istaknute škole koje su ostvarile najbolje rezultate.

- *Informacija o provođenju priprema za Eksternu maturu (testiranje) IX razreda osnovnih škola,*

Date su informacije o izvršenim pripremama od strane Pedagoškog zavoda za provođenje „Male mature“ kao eksternog testiranja. Urađena su uputstva i Pravilnik o pripremama škola i testiranju, kao i katalozi pitanja za pripremu učenika za testiranje i date su upute.

- *Informacija o realizovanim seminarima Pedagoškog zavoda TK Tuzla,*

Tokom decembra mjeseca 2015. i januara 2016. Pedagoški zavod je realizovao 27 seminara za nastavnike razredne, predmetne nastave osnovnih škola i profesore srednjih škola s ciljem jačanja profesionalnih kompetencija.

Na sastanku je bilo i riječi o

- Priprema škola za provođenje Obaveznog programa djece pred polazak u osnovnu školu:

Upis dorođe djece u prvi razred treba se obaviti do 15. marta, 2016. godine, nakon čega će škole dostaviti informacije nadležnoj predškolskoj ustanovi koja će poduzeti aktivnosti za pripremu provođenja obaveznog programa prije polaska u školu, kako bi se isti počeo provoditi od 1. aprila, 2016. godine i trajat će do 10. juna 2016. godine.

- Informacija o planiranim smotrama, festivalima i takmičenjima učenika za 2015/16. godinu:

Program takmičenja, smotri i festivala, bit će objavljen na web - stranici Pedagoškog zavoda.

Na samom kraju sastanka izvršena je dodjela priznanja školama koje su ostvarile najbolje rezultate na vrednovanju za školsku 2014/15. godinu. Direktor Pedagoškog zavoda, mr.sc.Nikola Čiča, dodijelio je najuspješnijim školama priznanja po kategorijama razvijenosti škola i postignutim rezultatima, kao i školama koje su u generalnom plasmanu ostvarile najbolje rezultate na TK.

Svim učenicima, nastavnicima, školama i roditeljima želimo uspješan i sretan početak drugog polugodišta.

Tuzla: 27.01. 2016. godine,

Stručno vijeće PZ TK Tuzla